

الصديقه الشاعره رطام
كل امثالت بالعهده
اسل عامر

شهاد الجينه

شعر عامر

امل عامر



الهيئة المصرية العامة للكتاب

٢٠٠٧

عامر، أمل.

شهد اللجنة/ شعر أمل عامر. - القاهرة: الهيئة
المصرية العامة للكتاب، ٢٠٠٦.

١٧٢ ص ٢٠٤ سم.

تدمك X ٥٢٣ ٤١٩ ٩٧٧

١ - الشعر العربي - تاريخ - العصر الحديث.
١. العنوان

رقم الإيداع بدار الكتب ٢٤٠٠٠ / ٢٠٠٦

I.S.B.N 977 - 419 - 523 - x

ديوى ٨١١,٩

الإخراج الفنى

عمر حماد

إهداء

إلى أمي ..

مبروك عليكى الجنة

وحشتينى

أمل

بنات

بتستغرب
لأنى باخبي إحساسى
وبامنع عن بنات أفكارى
شباكك
وبأمرهم مايتحنوش بأنفاسك
ولا يتكحلوا بصورتك
ولا يستنوا ضحكايه
تتور ليل ملامحهم

ومهما البرد طال عمره
مايدفوش بأنغامك
ولا يكونوا فى يوم جارك
ولا نعمة فى أوتارك
ما يتمنوش ولا لحظة

يكونوا عرايس الأحلام
ولا من شوقهم الدامي
لعبير صوتك
يهيموا في الفضاء الوهاج

مدن من عاج
بتسكن فيها أرواحهم
شوارعها
بتتنفس شذا ضلك
مبانيها
بتتزوق بكل كلامك الشادي
وأزهارها
بتتفتح بلمسة حب من إيدك

لأنى بخاف لتتألم مشاعرهم
يعيشوا العمر فى حيرة
ما بين عقلى وبين حبك
ها اعلمهم يواروا الوجد وجنونهم
بكل براءة ها يعدوا
بيبان صندوقهم المسحور

٢٠٠٥/١٢/١١

فلاش باك

إحساس مسروق
يزرع لك شدو بلابل جوه عينيك
ده خيال فنان
بيخايل لحظه طيش هريانة
من دفتر يومه المتذوق بطوابع كبت
وتوابع حلم قديم
مركون فى ادراج الروح

وبصوت مبجوح
بیشاور لما بيلمح حنة نور
من وسط ظلام أيامه بتلمع
يستكثر حتى الحلم عليه
ويلف مداين إحساسه

مبتور من أى شعور صادق
عمال بيدور
ويدور على ضل شفايف
طعمها عناب

يدخل في سيناريو قديم
متعاد للمرة الألف
ويلم مشاعره ويتأخذ
وفي غمضة عين
يفرد جناحاته على الآخر
يرسم في جنونه على الميه
ويمارسه بكل هدوء

وبيسأل نفسه
لوجت له اللحظة المنتظرة
وف أيده قصيدة
ها يجمد قلبه ويزرعها
واللاها يستسلم للحظة

٢٠٠٣/١٠/١٣

اعتذار

أيا صديق
ولا تخاف الهوى أبدا
ولا من قلب جنیه
بيفتح لك مداين كلها أفراح
ما تهريشى ده آخر سكتك هى
وهى هناك بتسمع همس أشواقك
وتترجاك تحاجى عليها بجناحك
وتخطفها لأبعد بحر فى عيونك

ما تترددش فى اللحظة ميتين مرة
دى لحظه حب
بالدنيا وما فيها
ولا فيها سوى صورتك محوطاها

بتبعده ليه
زمان الأنبيا ولى
بترمى بكل عزمك ليه حنانها ف بير
ولا يعدى عليها حد
يرمى لها جدائل صبر

ما تتدمشى على حيك
وغمض قلبك التأثير على إحساس
ما لك حيله فى ميلاده
ولا تزعل على كلمة

وبيع شوقك بأرخص سعر
لم دموعها في كفوفك
وبعترها على العاشقين
كسر ضي قنديلها في وجدانك
وسيبيها تكمل المشوار لوحديها
بدون طيران

٢٠٠٣/٨/١

الوهم

«لكى أكون دائما جميلة
وكى تكون أكثر اقترابا
أسألك الذهابا»
وماتلومنيش
إذا فتشت عنى ف يوم
ومالقتيش
ودورت ف حكاياتك وفى كلامك
وف سكاتك
ومالقتيش

وجوه عنيك بقيت تلمح دموع قلبی
وطال ليلك وعشت بتتظر حبی
ومالقتیش
أنا هابعد عشان تفضل حبيب لی
وها ازرع صبری جوایا
ده مع إنك لعمری
جرحی ودوایا

لكن تعرف
أنين النار فى بعادك
أكيد أرحم من الجنة وانا وياك
ياريت تعذرني وتصديق
«ماذا أنا (*)»
لو أنت لا تحبني
مالليل مالنهار مانجوم مالسحر»

ماتطلبشى لقلبي يعيد حساباته
دا قلبي إنت دقاته
ولو أعرف بحبك ليه
سؤال وما لهوش عندي رد
أنا ها ابعده
وادور في الدروب عنك
وها اسأل شجرة العصافير عن طيفك

وها اطلع لك جبل عالى
وادور بجنونى فى مسالك محبينه
وها تمنى بشوق الدنيا أرجع لك
وتعذرني أنا عاشقة
«لا لا تكترث (*)»
بكل ما أقول يا حبيبي
وابق معي إذا أنا سألتك الرحيل»

٢٠٠٥/٣/٣

(*) المقطمان من قصيدة نزار قباني «أسالك الرحيل».

قمر عاشق

حضورك عطر يتنفس شذاه الكون
أنادى طيفك الهريان لدنيا بعيد
تملى بدارى أشواقى للمسمة إيد
ما بعرفشى أحرر نفسى من حبك
ساعات باتمنى أكون غيرى
علشان أقدر أحب سواك

ياها تحمل عذاب قلبي وانا وياك
دموعي نجوم بتلألأ في ليل عشقك
فايوم ما يحسنى قلبك
ألا قيني وألاقي أرضى وسمايا
ضلام روجى ها يتبدد
لموج وشطوط

مهزلة

مقفولة شبابيك النهار
وأربع حروف متكتفين • متكممين
بيدوروا على أى حد
يشبكهم • يطيرهم على أطلال
بواقى جامعة منكوبة
ساكنها تنابلة السلطان

أربع حروف مستتيين يتحولوا
لجمرة غل في عروقهم
ويتنقشوا على هيكل
خريطة ضايعة ملامحها
حروف ويامين يرتبها
ويشعلها • يعيش ليلاها
ويصنع فجر ثوارها
يادوب كلمة

فصيلة دمها عربى

ال (ن) نواح القلب ع الاقصى الحزين

وال (خ) خذلنا النداء نذاك يا فلسطين

ال (و) وقفنا سنين مستتيين الدور

وال (هـ) هانت عروبتنا والخوف مبدور

أربع حروف نجمهم لهيب نخوة

نفرقهم بقوا خونة

صحيح خونة

٢٠٠٥/ /

عبير القرنفل

لو تسمحي
ها افتح ببيان قلبي فسَمِّي وادخلي
أكون لك ضلعك الناقص
ويكمل ببيك تكويني
أكون لك مستحيل ثالث
يخضر لك جناين روحك الشاردة

وبعد ما غنوتك تخلص
أعيد اللحن من تانى
أنانى قلبى وياك
وبيجرب يسابق حزنك الدافى
بعزم ما عنده يتحدى
بريق الدمع فى وريدك

وتفريدك عملته لصدرى دلالة
ودى حكاية مشاعر صافية ع الآخر
صفاء عطاء بلا نهاية
شرارة حب جوايا
وباتمنى تنور لى ضلام روحى

فَبَوِّحْ بِكُلِّ مَا عِنْدَكَ
خَزَائِنَ صَبْرِي مَا بَتَخْلَصُ
وَقَلْبِي مَفْتَحُ أَبْوَابِهِ
فَزِيحِي الْهَمَّ عَنْ نَفْسِكَ
وَسَمِّيْ وَادْخُلِيْ جَوَاهِرَ

٢٠٠٤/٨/١

البحر

عديت على برج حمام
هففت ريحة شجونك من بعيد
طيرت حلمى اللى كان
يحلم يشوفك
ياه ياريت
كنت باتمنى التقيك
فارد جناح الانتشاع المقهورين
جايب صباح من قد أياه مستيين

فوق أرض (شبعاء) (*)
نجم حاضن خطوتك
صوتك بيرشق دوامات
والصدى فرحة لقا ويا الجنوب
دندن في ظل الأرز هز الجذع
يسقط ولاد
دافنين فرح
حاطين رماد فوق القلوب

(*) شبعاء : منطقة بجنوب لبنان شهدت واحدة من أعنف المعارك
بين المقاومة والعدو الإسرائيلي

يا فرحتك
بيروت بتغسل شعرها من نور عينيك
جلجل بقى أشعلها يللا
وهد باب الشرنقه
(زهوة) بتستاك تعلمها النشيد(*)
أول كلام الغنوة حرية
علمها كلمة نصر بتتطق (ناصر)

(*) زهوة : زهوة ياسر عرفات

ما تعلی صوتک بالأذان
فوق مادنۃ الوجدان
ها تفضل شیخ إمام
قاعدین علی قهوة البستان
مستنینک ضی
علشان نستطعم مر الشای

٢٠٠٠/٦/٦

دون كيشوت

بيخادع نفسه
ويحاول يضحك على روحه
كل اما يبص على صحابه
بيفك مشابك ضحكته منه
ويطيرها لضي وشوش ما بيعرفهاش
ويمد ايديه يفتح ثغرات في ملامحه
يلزق في قناع تكشيرته

وبيتھيا له ها يقدر يقتل فيهم نفسه
وانه بكده ها يدوب كل توتر بيصاحبه
ليل ونهار
لما بيعزف على حواديت أحلامه
بيعصر نفسه
يتأمل فجاءه ف تكوينه

بیلاقی جیناتہ فی شجون درویش مجنون
واکمنہ ساعات بیدور علی قلبہ
ف کل خیال بیعدی علیہ
بیلاقی ف آخر مشاویرہ
أربع عیون بیندہوا
علی نجمۃ قاعدۃ بتبتسم
من غیر سبب

۲۰۰۴/۷/۱۹

منافسة

شهد اللجنة

على كتف السور العالى
قاعدة بتضحك لك بعنيها
تستى تحن عليها ف يوم
بصباح الخير
واما بيبجى الليل
وتلامس طرف إيديها
تتونس بيك

وتتور لك كل مفارق روحك
تسمع دقة قلبك
وتعد عليك أنفاسك
وانا ع البعد باموت وبادوب فى حنينى
كل ما بابتد اكتر هى تقرب
فرحانة بطيفك بيطوف حوالىها
رايح . جاى

مسروق من عمرى أيام بتعيشها معاها
لكنى باصبر نفسى إنك فى الآخر
ها تكون لى لوحدى
وساعتها قلبى اللى ها بيعت لك نوره
وحنانى ها يحاوطك فین ما تكون
وقتها ها تمد إيديك وتزيحها بعيد
وها تفضل بس عيونى تضحك لك
طول الوقت

٢٠٠٤/٨/٢٢

بند صغير

ها يحصل إيه
لو بعد ثوانى ما لقتيش
وبقيت مجرد خبر
وبينط صغير مكتوب
وفاة الشاعرة أمل عامر
تفتكروا ها يتغير حاجة
أنا مش زعلانة لكن هى الدنيا كده

من بعد أعز الناس ما سابوني ماباقتش تفرق
ممکن کل صحابی الشعرا يتحدوا فجأة
ويقرروا يعملوا حفلة تأبين
أنا شايفاهم دلوقت
محمد مطر والخالدين محمود وأمين(*)
فى عينيهم دمة وحزن بجد
وأميمة ووداد وهالة(*)

شعراء العامية: (محمد مطر - خالد محمود - خالد أمين - أميمة إسماعيل - وداد الهوارى)
والقاصة «هالة فهمى»

نازلىن بكا حقيقى قلوبهم بيضا
وواحد ما اعرفهوش قاعد حزين جدا
جايز اكون
أديت له ف يوم حنة ضحكة
ف ليلة عيد
أو طبطبت عليه بعيونى ف لحظة ضيق
جايز ...

هايقولوا كلام كثير عنى
وانى إنسانة بحق وحقيق
قلبي الأبيض فأخضر ياما شال أحمال كثير
واتحمل أوجاعهم وآلامهم
واتحمل قرف الدنيا وغباوتها
وتصدقوا وبجد المرة دى
لما يجينى ملك الموت
مش راح اخاف

ولا ها اجرى منه ذى كل مرة
المرّة دى
أنا موافقة أموت
بس ادفنوني فـ حضنها

٢٠٠٤/٥/٢٣

المستحيل الثالث

عصفور فضة
واقف على شباك أيامي
وخايف يدخل
رغم ان عيونه
قنديل بينور ضلمة روى
والضحكة سلالم بنور
بتوصل لبراح أسطوري

على مركب أحلامه مسافر
بيدور على قصره المسحور
ويضفر أشواقه لبنت بعيدة
في جبال القلق النازف حيرة
تايه ومدارى ف أحاسيسه
وف قمقم قلبه مخبى حاجات تبهر
بيخلق فى سمايا برقه
ويخلينى أصدق ان العمر مافاتش

وان البحر الثاير جوايا
هينام فى عينيه
وان المستحيل التالت
هيكون هو
عصفور فضة
غصب عنى
عدى من باب القصيدة
وفرد جناحاته لآخر حرف

٢٠٠٥/٨/٢

توأم الروح

مهداه إلى روح الشاعرة الغالية
ليلي محمد علي

صوتك بيمرح في الأماكن
صورتك على كل الوشوش
روحك بتسكن كل شيء
و (إخنا تون) (*)
بعيون ملآنه بالشجن
عمال يحاول بيتسم

(*) إخنا تون : فندق بمدينة أسيوط

ويفرق البهجة بحذر
وأنا بانتظر إحساس قديم
حسيته لكن من زمن
وقت أما كانت ضحكك
وردة على خدود البنات
وقت أما كات أحزاني بيك
بتكسر

ساعة ما قلبك كان بيحضن دمعتي
أما الحياة
فقصيده نكتبها سوا
وأنا وحدي بين الغربة وحنين اللقا
وأنين بيعصف بيّ
يعصر قلبي عصر
يهزمني ليل القاهرة
أو أي ليل في مداين الحب
اللى كات بتضمنا

يَخْرَسُ صوت قلمي اللي كان
بيحب دايما يكتبك
وغنايا ساعة ما ابتهج
وعنيك لما بيزورها المطر
كنت اجري أصحى شمس الدنيا
تسطع فرحتك

أيام بتحزين بعضها
متعطرة بالشوق
يزلزل في الضلوع
موجوعة أنا
يا توأم الروح
يا أنا

أسيوط

٢٠٠٥/٢/١٦

زقزقة

بنهرب • مانهرب
بخوفنا ولومنا
شروقنا • غيومنا
وليلنا اللى فارد إيديه ع الملاء
بنجرى • ما نجرى
ونسبق فى شوقنا
تزقرق دروبنا
ولاحد يلحق زماننا اللى رق

بنفـرح ٠ مانفـرح
ولو حتى حبة
يادوب نستخبى
فى أبـعدها موجة يا محلى الفرق
ها ننسى ٠ ما ننسى
قساوة قدرنا
وليلنا وسهرنا
وحيرة قرارنا مايبين آه ولا

ها نعيشق • ما نعيشق
دا ياما اتسينا
صبرنا وقاسينا
دا حتى جنونا جنون ع الورق
ها نهرب ونجری
ونفزع وننسى
ونعشق ولكن
ها تسعد لى قلبى
اللى بالحب دق ؟

٢٠٠٥/ /

تراويل الوجد

وانا وحدي
في ليل مارس
بمارس حزني ع المكشوف
وسيل الوجد يجرفني بأشواق
لحد هناك
واكلم نفسي فاكرني • بينكرني
بيحضن صوتي ويسبّح بحبي ليه

بیرمح والصهیل جواه
ماهو فارس وخیالی
وساکن عقلی وخیالی
بقالی سنین بلضم غنوتی ف موال
لسان حالی
وهو بعید بالاقی شذاه مونسنی
والاقی عینیہ فی کل مکان بتحرسنی
وطول الوقت جلال صوته بیلمسنی

ففي ليل مارس
بيضحك لي رصيف الشارع الدفيان
ببوس الناس على جبينه
ويلمح دمعتي الساكنة شراييني
ما بيني وبينه يسألني على طيفه
بشوق الدنيا أرجع تاني مهزومة
أمارس حزنني ع المكشوف
ففي ليل مارس
وأنا وحدي

٢٠٠٥ / ٣ / ١٧

هدية

للمركبتين حكايات
للمركبتين قصص
تتمد على آخر شروق
تستنى همسة شجن
فى المركبتين واحة
يطرح شجرها الشوق عناقيد
وعسل النخيل دافى

المركبتين فنار
يا فرح مين يهتدى
يوصل لأسعد بر
فى المركبتين شفتنى
الضحكة صابحة قوى
والقلب متعافى

للمركبتين حراس
فارشين الضل آيه
في المركبتين ولد
بينقر على باب أحلامى
ويشوط الدنيا
المركبتين قصيدة
للعاشق والمعشوق ضيا

٢٠٠٤ /

٢٠٠٤ /

المركبتين قناديل
باكتشف العالم بيهم
فيهم سحر دفين
فى المركبتين أنا
نعسانة فى الننى

٢٠٠٤ /

نورس

مهداة إلى روح الأديب الإنسان
مصطفى عبد الوهاب

لسه شايلاه امبارح
بيمد الضحكة يسلم
ويمد الخطوة يسابق روحه
حاضن كل بنات أفكاره وماشى
مستمجّل زى العادة
بيفرق ف حنانه وطيبة قلبه
على كل صحابه

ياما كان يشكى لى حنينه لراحة بجد
وعذابه لكونه إنسان بصحيح
كان نفسه ف يوم يتمرد
ويعيش بجنون
كان حلم حياته يفرح بحصاد العمر
يحضن بعنيه نبت صغير
يصلب عوده

واما یشوفنی باداری شجونی
یجری یطبطب علی احزانی
بصوت وناس
دی جنینه قلبه دفا وبراح
وجع یشجینا لیل و صباح
ازای بیقولوا دا راح ؟
وانا لسه شایفاه امبارح

۲۰۰۴/۱۲/۶

آخر فصل

ما تطفئش النور
وما تقفلش ستاير قلبك
المشهد مفتوحة نهايته
والجمهور عمال يسأل بعنيته
دماغه الفاضية من الإعجاب
عمالة تفكر ازاي ها نحل الموقف
ونواجه بعض بحقيقتنا

وندورع الحل الأمثل
لحكايه بتحاول تنهى حياتها
من قبل ما تبدأ
وإن كنا صحيح بنعانء كل ما فينا
من تراكيب متناقضة
وبنسأل ذاتنا هل هى قدرنا
واللا احنا اللى استسلمنا

مش صعب علينا نخادع روحنا
نضحك لوشوشنا طول الوقت
مهموزة صورتنا ولا قادرين
نمسح تجاعيد أرواحنا
مع إن دموعنا بتهرب منا
ومُصرة على موقفها

واما حاولنا نروض مشاعرنا

مشيت بالعكس

ولا بصيتش وراها

إشارات العقل زادت شوشرة

على كل مراكز مشاعرنا

واما اتقفلت ستارتنا

وقف الجمهور يتبسم

واتطفى النور

٠٠٤/٨/٣٠

متابعة

ما تصدقش فرح الدقايق باللقا
ولا رقص فستان الأمانى ع البدن
وما تفتحش ببيان القلب ع الآخر
واربى المشاعر حبتين
اتوحدى ويا الألم
واتبسمى لقلوب خشب
كل الحكاية
إنك طاوعتى الشوق لآخر سكتة
وخذعتى نفسك بالأمل

سبقاكي خطوة قلبك العطشان هنا
مالقيتي أيد تتمد لك
داريتي الحزن في وريدك
وطفيتي قمر شوقك
وقلتي لروحك الأسيانة معلشي
كان مرة في قلب انكسر
بس اتتسى

٢٠٠٣/٨/١٢

ولا يوم تنسى

وبتسألك عن آخر أخبار قلبك
وقبل اما تجاوب
بتمد إيديها وتطفئ شرارة الكذب
وتفوص في بحور الدفا في عينيك
تتعجب من سحر بريق الحب وتسأل تانى
تضحك وتقول مصرية ولكن ؟

وتحاول تخفى ف حيرتك وشروذك
تطلق جناحين الحلم وتطير فرحان
نشوان من كونك فايت كل همومك
وواخدها معاك على دنيا جديدة ما تعرفوهاش
عنقود الشوق يتلألأ بينها وبينك
وكلام بتقوله إيديك بيدوَّب فيها
مشوار مفروش بالوجد وبالأشواك

وخيال لسنين بتحارب فيها
تحاول تمحى صورتها بحب حقيقى
إن كان خلاك تستنى كثير
دا لأنه محوش لك فرحة
دايما تستكترها عليك
ولإنك صافى بيفضل حبك دايماً
بديل للموت

٢٠٠٥/١/١٢

وشوشة

إيزيس
خرجت م الحلم بروح شفافة
لفت زهرات اللوتس
حوالين معصمها
رقصت رقصتها الأولى
على ضوء فرحتها البكر
ترفع كفيها تلامس نظرة عينه
تلمح بدر السما بيبوس في كتافه

تضحك كما أول ضحكة
ف ليل مجروح
والروح بتوارب مشاعرها
لحد ما يطمئن نبض القلب
الخوف عفريت مجنون
مش راضى يهاجر لبعيد
علشان تسبح فى النور
وتعاود تغزل فى الجناحين

مرسومه عينيه
على كل نسيم بيهل
بتطارده فيها
تهرب للشوق وهديل لمسّه
إيزيس
تمضغ في قلقها
وتعبي بذور الدفا في كيائها
وتقرر تدخل في الحلم

٢٠٠٥/٢/١٤

سجن الروح

سلاسل
بتخفق فى جیدی
وقلبى وإیدی
سلاسل مابینى و بینى
وبینک و بینى
بتوسع وتوسع
وتصبح نوافذ
أفوت بین ضلوعها
أطیر فى الفراغ

واحس أنى عايشة
لياالى اشتهايتها
بعمري اهتديتها
واعدى بخيالى حدود احتمالى
ولكنى بارجع أشرنق بيبانى
تمضغنى تانى سنينى العجاف
سلاسل
بتصغر وتصغر
تكسّر فى روحى

وتخرس لى بوحى
تلجم جموحى
مفیش حل تالت
ياقلبى یغمض وينسى انه قلب
يا إما ابقى روح بلا زقزقة

٢٠٠٥/٧/٥

ميلاد

شهد الجنة

زى كل يوم بيمر
بتمارسى طقوسك بملل
وبتفتحي قلبك للدنيا
تقرى الفاتحة لأغلى الناس
وبتخنقى دمعك فى الننى
مسروقة سنينك منك
والبنت ام ضفيرة بتضحك
عمالة بتلعب جواك

ترسم وتغنى بشجن
وتسيطر بجنونها
وكل حنانها عليك
وبتزعل لما تشوفك
بتداری ف تجاعید روحك
ترقص على أوتار قلبك
تتخبى فى معانى قصايدك
وبتعمل شقاوتها مراكب
بتعومها ف بحر عينيك

واما تلاقى عبيرك تايه
تجرى تدور على شطيتك
مهما ان فات العمر عليها
ما بتكبرش
ولا تقدرش تخرج منك
لما بتقسى عليها
بتملا عينيك دموعها

واما تزقزق
بتطير عضافير افراحك
ليه النهارده بتجرحيها
مع إنه يوم
زى أى يوم بيمر

٢٠٠٣/٦/٣

نسيم الحب

أطلق جناحك فى الخلا
وافتح ببيان الجنة
ارسمنى على قلبك حروف
طول عمرى باتمنى
ألقي لى مرسى ووطن
وحضن دافى شفيف
أطلق جناحك فى الخلا
وافتح ببيان الجنة

علمنى احب الحياة
وانسانى جوه عنيك
دا انا من هواك بارتوى
بيك الوجود غنا
أطلق جناحك فى الخلا
وافتح ببيان الجنة

يهزمنى ليل الوجد
والغربة جوه الضلوع
تصلى الروح بمحرابك
ما هو انت الفرض والسنة
أطلق جناحك فى الخلا
وافتح ببيان الجنة

بدّل خريف أيامي
غيّر لي تواريخي
اكسر حدود الألم
وانقش في سعادة أيامنا
أطلق جناحك في الخلا
واسبقني على باب الجنه

٢٠٠٤ /

طريق

طريق واحد
بتهرب منه خطاويك
وغصبن عن ضنى روحك
بيفضل ضلك المكسور
على جبينه
طريق مسدود من الجنين
مفیش مخرج
وبيموت الأمل جواه

طريق ضلّمة
ولولا شمعتين بنور
ما كات تطرح غناويك
طريق قاسى
ومادد إيده سارق
بهجة الأيام
وخانق حتى نفس القلب

طريق فاضى
سوى من شجرة ملعونة
بتطرح زيف
يمر العمر وتتجسس خلايا الروح
مايبقى غير
طريق واحد

شهد الجنة

صاحبتى اللى عدت سن الرشد بشوية
ساعات كتير بتشبه لى
لما بأفكر فيها بلقاها كائن أسطورى
بتوترنى لما بتخلع قلبها فجأة
وتحطه قدامى
ماباعرفشى أهدهد مشاعرها القلقانة
ولا حيرة ذاتها مايبين ال آه وال لأ
عمالة تشد حبال الحب الدايبة
صبح وليل

لما بلاقى دموعها ف عيني
بالبس فستان العقل الضيق
علشان أحاصرها ف ثورتها
وتعبت كثير علشان أفهمها
إن اللحظة ف حزن حبيب بالعمر بحالة
وإن اللمسة ممكن ترحل بيها لجُزر الدنيا
من غير ما تفكر ترجع
وإن الشهد بعنقوده من حُزن شفايفه
ولا شهد الجنة
أحياناً بافتح صندوقى قصاها

وباطلَّ جزء من الحوادث المرة
وبافك زراير ضحكتي منى
ساعتها بتمد إيديها
وتقفل فى ستارة حكاوينا
لما تلاقى غيامة اترسمت على ملامحنا
لو هاتسلم يوم بكلامى
مش ها تفكر تانى ف لحظة
تفتح باب القفص الوردى وتطير

٢٠٠٤/٥/٢٦

صدر للشاعرة

- ١ - ديوان (الشكومية) ١٩٩٩ .
سلسلة «الجوائز» الهيئة العامة لقصور الثقافة .
 - ٢ - ديوان (مساحة دفا) ٢٠٠٠ .
سلسلة «كتابات جديدة» الهيئة المصرية العامة للكتاب .
 - ٣ - ديوان (ريحة العطش) ٢٠٠٣ .
سلسلة «إشراقات جديدة» الهيئة المصرية العامة للكتاب .
-

الفهرس

٣ اهداء
٥ بنات
١٣ فلاش باك
٢١ اعتذار
٢٩ الوهم
٣٧ قمر عاشق
٤١ مهزلة
٤٧ عبير القرنفل
٥٣ البحر
٥٩ دون كيشوت
٦٥ منافسة
٧١ بنط صغير
٧٩ المستحيل الثالث
٨٥ توأم الروح

٩٣	زقزقة
٩٩	تراتيل الوجد
١٠٥	هدده
١١١	نورس
١١٧	آخر فصل
١٢٣	متاهة
١٢٧	ولا يوم تنسى
١٢٣	وشوشه
١٣٩	سجن الروح
١٤٥	ميلاد
١٥١	نسيم الحب
١٥٧	طريق
١٦٣	شهد الجنه
١٦٩	صدر للشاعره

مطابع الهيئة المصرية العامة للكتاب

ص.ب : ٢٣٥ الرقم البريدى : ١١٧٩٤ رمسيس

WWW.egyptianbook.org

E - mail : info @egyptianbook.org